

აჭარის ავტონომიური რესპუბლიკის

კ ა ნ ო ნ ი

„აჭარის ავტონომიური რესპუბლიკის ნორმატიული აქტების შესახებ“ აჭარის ავტონომიური რესპუბლიკის კანონში ცვლილებების შეტანის თაობაზე

მუხლი 1. „აჭარის ავტონომიური რესპუბლიკის ნორმატიული აქტების შესახებ“ აჭარის ავტონომიური რესპუბლიკის კანონში (გაზეთი „აჭარა“, №251, 22.12.2004) შეტანილ იქნეს შემდეგი ცვლილებები:

1. მე-3 მუხლის მე-4 პუნქტი ჩამოყალიბდეს შემდეგი რედაქციით:

„4. ინდივიდუალური სამართლებრივი აქტი ერთჯერადაა და უნდა შეესაბამებოდეს ნორმატიულ აქტს. ინდივიდუალური სამართლებრივი აქტი მიიღება (გამოიცემა) მხოლოდ ნორმატიული აქტის საფუძველზე და ნორმატიული აქტით დადგენილ ფარგლებში. ინდივიდუალური სამართლებრივი აქტის დასახელება არ უნდა ემთხვეოდეს ნორმატიული აქტის დასახელებას, გარდა უმაღლესი საბჭოს და უმაღლესი საარჩევნო კომისიის დადგენილებებისა და მინისტრის ბრძანებისა.“.

2. მე-10 მუხლის მე-3 პუნქტი ჩამოყალიბდეს შემდეგი რედაქციით:

„3. კანონი შეიძლება მიღებულ იქნას „აჭარის ავტონომიური რესპუბლიკის სტატუსის შესახებ“ საქართველოს კონსტიტუციური კანონით აჭარის ავტონომიური რესპუბლიკის განსაკუთრებული გამგებლობისათვის მიკუთვნებულ საკითხებზე, ასევე საქართველოს საკანონმდებლო აქტებით პირდაპირ განსაზღვრულ შემთხვევებში.“.

3. მე-11 მუხლიდან ამოღებულ იქნას მე-3 პუნქტი.

4. მე-12 მუხლის მე-5 და მე-6 პუნქტები ჩამოყალიბდეს შემდეგი რედაქციით:

„5. სამინისტროს სისტემაში შემაკვალ სტრუქტურულ ერთეულებს, ტერიტორიულ ორგანოებს, საქვეუწყებო დაწესებულებებსა და მთავრობის მიერ შექმნილ საჯარო სამართლის იურიდიულ პირებს არა აქვთ ნორმატიული აქტების მიღების (გამოცემის) უფლება.“.

6. ორმა ან ორზე მეტმა მინისტრმა შეიძლება გამოსცეს ერთობლივი (სამინისტროთაშორისო) ბრძანება, რომლის მომზადების, გამოცემის, გამოქვეყნებისა და ამოქმედების წესი განისაზღვრება ამ კანონით.“.

5. მე-13 მუხლის მე-2 პუნქტი ჩამოყალიბდეს შემდეგი რედაქციით:

„2. უმაღლესი საარჩევნო კომისიის დადგენილება შეიძლება მიღებულ იქნას მხოლოდ „აჭარის ავტონომიური რესპუბლიკის უმაღლესი საბჭოს არჩევნების შესახებ“ აჭარის ავტონომიური რესპუბლიკის კანონით პირდაპირ განსაზღვრულ შემთხვევებში.“.

6. მე-17 მუხლის მე-2 და მე-3 პუნქტები ჩამოყალიბდეს შემდეგი რედაქციით:

„2. მთავრობის დადგენილებისა და მინისტრის ბრძანების მომზადების, გამოცემის, გამოქვეყნებისა და მოქმედების წესი განისაზღვრება აჭარის ავტონომიური რესპუბლიკის კონსტიტუციით, ამ კანონითა და „აჭარის ავტონომიური რესპუბლიკის მთავრობის სტრუქტურის, უფლებამოსილებისა და საქმიანობის წესის შესახებ“ აჭარის ავტონომიური რესპუბლიკის კანონით.

3. უმაღლესი საარჩევნო კომისიის დადგენილების მომზადების, გამოცემის, გამოქვეყნებისა და მოქმედების წესი განისაზღვრება ამ კანონით, „აჭარის ავტონომიური რესპუბლიკის უმაღლესი საბჭოს არჩევნების შესახებ“ აჭარის ავტონომიური რესპუბლიკის კანონითა და უმაღლესი საარჩევნო კომისიის რეგლამენტით.“.

7. მე-20 მუხლის მე-2 პუნქტი ჩამოყალიბდეს შემდეგი რედაქციით:

„2. ნორმატიულ აქტს შეიძლება ჰქონდეს პრეამბულა. მასში გადმოიცემა ამ ნორმატიული აქტის დანიშნულება და პრინციპები, რომლებიც მას უდევს საფუძვლად. თუ აქტი კანონქვემდებარეა, პრეამბულაში მითითებულ უნდა იქნეს, თუ რომელი საკანონმდებლო აქტის საფუძველზე ან შესასრულებლად გამოიცა იგი.“.

8. 23-ე მუხლის მე-2 პუნქტი ჩამოყალიბდეს შემდეგი რედაქციით:

„2. მთავრობის სტრუქტურის, უფლებამოსილებისა და საქმიანობის წესის შესახებ კანონის პროექტის, აჭარის ავტონომიური რესპუბლიკის რესპუბლიკური ბიუჯეტის შესახებ კანონის პროექტის, აგრეთვე მათში ცვლილებების ან/და დამატებების შეტანის თაობაზე კანონპროექტების წარდგენის უფლება აქვს მხოლოდ მთავრობის თავმჯდომარეს. უმაღლესი საბჭოს რეგლამენტის პროექტის, ასევე უმაღლესი საბჭოს რეგლამენტში ცვლილებების ან/და დამატებების შეტანის თაობაზე პროექტის წარდგენის უფლება აქვს მხოლოდ უმაღლესი საბჭოს წევრს, უმაღლესი საბჭოს ფრაქციას ან კომიტეტს.“.

9. 25-ე მუხლის მე-5 პუნქტი ჩამოყალიბდეს შემდეგი რედაქციით:

„5. უმაღლეს საბჭოში მთავრობის თავმჯდომარისა ან მთავრობის ინიციატივით შემოტანილ კანონპროექტზე მომხსენებლად გამოდის მთავრობის თავმჯდომარის ან მთავრობის მიერ სათანადო ადმინისტრაციულ-სამართლებრივი აქტით დანიშნული უფლებამოსილი წარმომადგენელი, რომელიც არ შეიძლება იყოს უმაღლესი საბჭოს წევრი.“.

10. 26-ე მუხლის მე-3 პუნქტი ჩამოყალიბდეს შემდეგი რედაქციით:

„3. ნორმატიულ აქტში ცვლილებების ან/და დამატებების შეტანის თაობაზე, ნორმატიული აქტის პროექტში, მითითებული უნდა იყოს მონაცემები, იმ ნორმატიული აქტის შესახებ, რომელშიც შედის ეს ცვლილებები ან/და დამატებები. კერძოდ, ნორმატიული აქტის სათაური, იმ ოფიციალური ბეჭდვითი ორგანოს სახელწოდება, რომელშიც აღნიშნული ნორმატიული აქტია გამოქვეყნებული და გამოქვეყნების თარიღი.“.

11. 28-ე მუხლის მე-4 პუნქტი ჩამოყალიბდეს შემდეგი რედაქციით:

„4. მთავრობის დადგენილება მიიღება მთავრობის სხდომაზე, მთავრობის წევრთა სრული შემადგენლობის უმრავლესობით. ხმების თანაბრად გაყოფის შემთხვევაში გადაწყვეტა სხდომის თავმჯდომარის ხმა.“.

12. 29-ე მუხლის:

ა) პირველი პუნქტი ჩამოყალიბდეს შემდეგი რედაქციით:

„1. უმაღლესი საბჭოს მიერ მიღებული კანონპროექტი 5 დღის ვადაში, წამყვანი კომიტეტის თავმჯდომარის (მისი არყოფნის შემთხვევაში – მოადგილის), კომიტეტის აპარატის პასუხისმგებელი პირის, უმაღლესი საბჭოს აპარატის იურიდიული, საკადრო და საქმისწარმოების და საორგანიზაციო და საზოგადოებასთან ურთიერთობის დეპარტამენტების მიერ ვიზირებისა და სხდომის თავმჯდომარის ხელმოწერის შემდეგ გადაეცემა მთავრობის თავმჯდომარეს.“.

ბ) მე-3 პუნქტი ჩამოყალიბდეს შემდეგი რედაქციით:

„3. თუ მთავრობის თავმჯდომარე დაუბრუნებს კანონპროექტს, უმაღლესი საბჭოს კენჭს უყრის მთავრობის თავმჯდომარის შენიშვნებს. შენიშვნათა მისაღებად საკმარისია ხმათა იგივე რაოდენობა, რაც კანონპროექტისთვის ამ კანონის 28-ე მუხლის მე-2 პუნქტითაა დადგენილი. იმ შემთხვევაში, თუ უმაღლესმა საბჭომ მიიღო მთავრობის თავმჯდომარის შენიშვნები, მთავრობის თავმჯდომარე ხელს აწერს და აქვეყნებს კანონს მისთვის გადაცემიდან 5 დღის ვადაში.“.

13. 39-ე მუხლის მე-2 პუნქტი ჩამოყალიბდეს შემდეგი რედაქციით:

„2. იუსტიციის დეპარტამენტს უნდა გადაეცეს აჭარის ავტონომიური რესპუბლიკის საკანონმდებლო და კანონქვემდებარე ნორმატიული აქტები ხელმოწერიდან 5 დღის ვადაში.“.

მუხლი 2. ეს კანონი ამოქმედდეს გამოქვეყნებისთანავე.

აჭარის ავტონომიური რესპუბლიკის
მთავრობის თავმჯდომარე

ლევან ვარშალომიძე

ბათუმი,
2007 წლის
№

